

Soalan No: 102**PEMBERITAHU PERTANYAAN DEWAN RAKYAT****PERTANYAAN :** LISAN**DARIPADA :** TUAN WONG TIEN FATT @ WONG NYUK FOH
[SANDAKAN]**TARIKH :** 27.7.2017**SOALAN :**

Tuan Wong Tien Fatt @ Wong Nyuk Foh [Sandakan] minta MENTERI PENDIDIKAN menyatakan:-

- (a) bilangan guru yang bukan berasal dari Sabah yang kini sedang berkhidmat di Sabah; dan
- (b) bilangan guru berasal dari Sabah yang kini berkhidmat di negeri lain dan apakah langkah untuk mencapai matlamat lebih ramai guru berasal dari Sabah untuk berkhidmat di Sabah.

JAWAPAN

Tuan Yang di-Pertua,

- (a) Untuk makluman Ahli Yang Berhormat, sehingga 10 Julai 2017, terdapat seramai 16,171 guru yang sedang berkhidmat di sekolah rendah di negeri Sabah. Daripada jumlah tersebut 2,952 (18 peratus) adalah merupakan guru bukan kelahiran negeri Sabah. Manakala di sekolah menengah 3,023 (12 peratus) dari jumlah keseluruhan 26,214 guru yang berkhidmat di sekolah menengah merupakan guru bukan kelahiran negeri Sabah.

- (b) Keseluruhan guru berasal dari Sabah yang berkhidmat di sekolah rendah seluruh Malaysia berjumlah 24,631 orang guru. Daripada jumlah tersebut seramai 2,606 (11 peratus) orang guru berkhidmat di Sekolah Rendah di luar negeri Sabah. Manakala guru berasal dari Sabah yang berkhidmat di Sekolah Menengah seluruh Malaysia berjumlah 13,852 orang guru. Daripada jumlah tersebut, seramai 1,731 (13 peratus) sedang berkhidmat di luar negeri Sabah.

Dalam usaha untuk mencapai matlamat lebih ramai guru berasal dari Sabah untuk berkhidmat di Sabah, KPM telah dan sedang mengambil tindakan seperti berikut:

1. Tiada penempatan guru dari semenanjung ke negeri Sabah bagi mengisi kekosongan perjawatan.
2. Hanya calon dari Sabah sahaja yang dibuat penempatan bagi guru baharu.
3. Membawa sebanyak mungkin guru dari Semenanjung untuk balik ke Semenanjung bagi setiap kali pertukaran guru dilaksanakan.
4. Tiada kelulusan guru dari Semenanjung yang diluluskan bertukar ke Sabah kecuali bagi kes mengikut pasangan di negeri Sabah.
5. Lantikan guru interim dalam kalangan calon dari Sabah bagi mengisi kekosongan perjawatan sedia ada.
6. Pengambilan guru baharu kelahiran Sabah secara pasaran terbuka (*open market*). Pelantikan guru baharu dalam kalangan calon *open market* masih tertakluk kepada syarat skim Pegawai Perkhidmatan Pendidikan yang sedang berkuat kuasa.

SOALAN (104)**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN

TARIKH : 27 JULAI 2017
[KHAMIS]

DARIPADA : YB TUAN LOKE SIEW FOOK
[SEREMBAN]

SOALAN :-

YB Tuan Loke Siew Fook [Seremban] minta MENTERI KESEJAHTERAAN BANDAR, PERUMAHAN DAN KERAJAAN TEMPATAN menyatakan secara terperinci senarai pemaju serta projek perumahan mereka yang diberikan "Extension of Time" (EOT) oleh pihak Kementerian sejak 2013 serta projek-projek yang masih belum disiapkan.

JAWAPAN :-

Tuan Yang di-Pertua,

Untuk makluman Ahli Yang Berhormat, dari tahun 2014 sehingga 30 Jun 2017, Jabatan telah menerima sebanyak **441 permohonan EOT**. Dari jumlah tersebut sebanyak **354** permohonan diluluskan termasuk kelulusan bersyarat manakala baki **87** permohonan telah ditolak. Kesemua permohonan ini dipertimbangkan di bawah **Peraturan 11(3) (Keputusan Pengawal Perumahan untuk meminda peruntukan kontrak jualan)** dan **Peraturan 12 (Rayuan kepada Menteri)**. Memandangkan permohonan ini adalah dikemukakan pada tahun 2014 bagi pemajuan yang baru (tempoh siap di antara 24 bulan hingga 36 bulan mengikut jenis pemajuan) maka hampir semua pemajuan ini adalah masih di dalam pembinaan atau akan siap pada atau selepas tahun 2018 setelah mengambil kira pelanjutan tempoh yang diberikan:

i) **Peraturan 11(3) (Keputusan Pengawal Perumahan untuk meminda peruntukan kontrak jualan)**

Sebanyak **416** permohonan telah dipertimbangkan di bawah

Peraturan 11(3) di mana sebanyak **338** permohonan telah diluluskan manakala **78** permohonan lagi telah **ditolak**.

Permohonan-permohonan yang diluluskan di bawah Peraturan 11(3) majoritinya adalah terdiri daripada **projek yang masih belum dijual** selain membabitkan projek-projek yang ditimpa bencana alam seperti banjir pada tahun 2014.

ii) **Peraturan 12 (Rayuan kepada Menteri)**

Manakala di bawah Peraturan 12 (Rayuan kepada Menteri), sebanyak **25** permohonan telah diproses di mana sebanyak **3** permohonan **diluluskan tanpa syarat**, **4** permohonan **diluluskan dengan syarat persetujuan pembeli** dan **9** permohonan **diluluskan dengan syarat memaklumkan pembeli**. Baki **9** permohonan lagi telah **ditolak**.

Kementerian Kesejahteraan Bandar,
Perumahan dan Kerajaan Tempatan

Julai 2017